

REGIONAL NEWS BULLETIN

HEADLINES (EVENING)

Date – 17/05/2024

Time - 18:30 Hrs

1. India leh Bangladesh ramri hungna tur atana sorkarin mimal ram a laksak ah LSC lem hmanga zangnadawmna la mi 23 te thiamloh chantir a ni.
2. LADC CEM atan lak luh United Legislature Party hruaitu Pu C. Lalmuanthanga chu vawiin khan LADC Session-ah rintawk a ni tih fiah a ni.
3. External Affairs Minister Dr. S. Jaishankar-a chuan hun lo kal turah India chu khawvela thiltitheh berte zinga awm turin a theihna hrang hrangah hma a sawn zel dawn a ti
4. Inthlan thawh sarihna chuh tumte tana inhnuhdawh theih hun chu vawiin khan a tawp.

<><><>

23 ARRESTED IN COMPENSATION CASE

Prevention of Corruption Act, Special Judge Pu HTC Lalrinchhana'n India leh Bangladesh ramri hungna tur atana sorkarin mimal ram a laksakah Land Settlement Certificate, LSC lem hmanga zangdawmna la mi 23 te thiamloh a chantir.

Kum 2007 khan ramri hungna siam hna hi kalpui niin LSC lem 35 hmangin zangnadawmna la an awm tih hriatchhuah a ni a. He thubuai hi Central Bureau of Investigation, CBI chuan chhuiin hetih hun laia CADC Revenue Officer Ranga Mohan Chakma chu LSC lem pechhuak tu berah puh a ni a. CADC hnuaiia Surveyor pahnihte nen inthuralin ram lak ngai tur hming list pawh diklo taka siama puh an ni a. He thubuaia LSC pekchhuah ho hi sorkar pisa chawlhni a pek vek ni a tarlan a ni bawh.

He thubuaia thiamloh chantir te hi bail a chhuah lailawk anlo nih tawhna chu sut a ni a. Lung In ah khung nghal turin court chuan an chungthu a rel a ni.

<><><>

NGOS MET CM

Vawiin khan Mizorama Environment lama hnathawk thintu NGO panga - Centre for Environment Protection (CEP), Association for Environmental Preservation (ASEP), Green Mizoram Network (GMN), Save Environment Association (SENA) leh Clean and Green Revolution (CGR) te chuan thuchhuah intawm siamin, Chief Minister hnenah an thehlut a.

Joint Statement a an tarlan danin Mizorama ramhmulte awmze nei zawka humhalh leh chhawr tangkai a nih theihna turin National Working Plan Code 2023 behchhanin territorial Forest Divisions zawng zawng tan Working Plan/Scheme hi siam vat ni se an ti a, Recorded Forest Areas (RFAs) chungchang-ah Mizorama Reserved Forests, Protected Areas, etc. te chu nek nasat niin a lang tih an sawi a, RFAs chhûng hmun tam taka khua, in ding, huan hmun nghet te survey chian a, dân anga hnawhchhuah) emaw ram 'Pass' cancel ngai leh dân hmanga dah ngheh) theih chi thliara chin fel vat a pawimawh hle tih an sawi.

Mizoram State Forest Development Corporation (MSFDC) din ve ngei ni se a tha an ti a. MSFDC hmang hian State-in sum a hailuh theih dawn bakah 'ecopreneurs' leh kuthnathawk tam tak tak eizawn huang zauh theih a ni dawn a ni, an ti.

Heng bakah hian The Mizoram (Forest) Act, 1955 siamthat an rawt a. Bawlhhlawh enkawl leh sawngbawl chungchangah dân hman mek kenkawh kawngah nasa zawka ‘awareness campaign’ neih leh dân kengkawhtute pawhin dânin tih tur a tih dân anga tih kawngah chak zawkin hmalak ni se la, Aizawl khawpui bikah chuan Aizawl Municipal Corporation Solid Waste Management Bye-Laws, 2019 leh Aizawl Municipal Corporation Plastic Waste Management Bye-Laws, 2019 te hi khauh zawkin AMC hian kengkawh turin an beisei tih an sawi bawk a ni.

<><><>

RAINFALL THIS YEAR

Kum dang nena khaikhinin kuminah Mizorama ruahtui a tla tlem.

Akashvani Corr in Aizawl Meteorological Centre Director Sudheer Kumar Dwivedi a kawmnaah he thu hi a sawi a, Pu Dwivedi-a chuan Sorkar khawchin thlirtuin a chhinchhiah dan chuan kum dang January atanga tun thla thlenga ruahtui tla thin aiin kumina ruahtui tla hi zaa 45-in a tlem zawk a ti a. Kum dang hetih huna ruahtui tla hi a tlangpuiin Milimeter 370.40 a nih thin laiin kuminah chuan milimeter 203.10 chauh a tla a ni a ti.

Aizawl district bikah chuan kum dangah a tlangpuiin milimeter 445.60 a tla thin a, kuminah chuan January ni 1 atang tun thla thlengin milimeter 376.40 chauh a tla a. Champhai District-ah ruahtui a tla tlem zual bik hle a; kum danga milimeter 305.20 vel tla thin kha kuminah chuan milimeter 48.8 chauh a tla a ni.

<><><>

LADC CEM WINS VOTE OF CONFIDENCE

Tunkar Thawhlehnia Lai Autonomous District Council (LADC) Chief Executive Member (CEM) atan lak luh United Legislature Party hruaitu Pu C. Lalmuanthanga chu wawiin khan LADC Session-ah rintawk a ni tih fiah a ni.

LADC-ah hian thla hnih chhung sorkar siam theih a nih loh hnuah Congress Member pakhat leh MNF Member 12 ten an din United Legislature Party hruaitu, Congress Member Pu C.Lalmuanthanga chu wawiin khan LADC Session-ah CEM atana rintawk a nih leh nih loh fiah a ni a; he huna tel Elected MDC 18 atangin CEM ring tawk Member 12 awmin a ring tawk lo zawngin Member 6-in ban an phar a. Chairman Pu VL Hmuaka chuan CEM Pu C.Lalmuanthanga’n CEM rintawkna a paltlang tih House-ah a puang.

CEM thar Pu C. Lalmuanthanga chuan LADC-ah mipui ban phak sorkar din a tul thu sawiin, Party pahnihin an siam sorkar ni mah se Party bil leh thunei bik awm chuang lo, hmasawna atana tha turah chuan mimal thuneihna kalsanin a tam zawkin tha an tih lamah sorkar chu a kal dawn a ni, a ti a. CEM atana rintawkna a paltlang avangin lawmthu a sawi a, Member te chu ram rorelnaah amah finchhuah thin turin a sawm.

Wawiin LADC Session-ah hian Deputy CEM (Designated) Pu Sanghuliana Mualchin, Pu T. Zakunga leh Pu V. Zirsanga ten CEM thar lawmpuina thu sawiin duhsakna an hlan a ni.

<><><>

LUNGLEI POLICE CYBER CRIME

Lunglei Police Station-a Cyber Cell chuan Mobile phone bo leh ruk an zawnchhuah te a neitute hnenah wawiin khan an hlan let.

Mobile Phone 11, a neitu dik takte hnena hlan letna hunah hian Lunglei SP Pu J. Lalmuankima chuan Lunglei Police Station-a Cyber Cell te lawmthu hrilhin an thawhrimna avanga hetiang zat mobile phone bo hmuh let leh a ni hi fak tlak an ni, a ti a. Mobile phone bo hi Lunglei mai ni lo, Mizoram leh India ram hmun dangah a tam em em a, a tibotute tan uiawm tak a ni a; chuvangin Lunglei Police te chuan te lua awm loin, mobile phone tih bo report awm tawh phawt chu a tam thei ang ber theihtawpin chhuichhuahsak zel an tum a ni, a ti.

Tunlaih IT lama changkanna umphak ve zel a tul thu sawiin Lunglei SP chuan, tuna an hlawhtlinna pawh hi Central Equipment Identity Register (CEIR) portal awmze nei taka an hman tangkai vang a ni, a ti a. Sualna pung chho zel mila Police te pawhin hmasawna an neih chhoh ve zel a tul thu a sawi bawk. Mobile bo rinhlelhawm tih hre reng chungah lo leisaktute emaw lo thlengtute emaw chungah pawh hma an lak zel dawn thu sawiin, tun hnaiah hetiang dik lo taka lo leitute hi man an nei nual tawh a ni, a ti.

Wawiina Mobile phone bo hmuh let, a neitute hnena hlan tak te kumin April ni 23 atanga tun thla ni 16 chhunga chhui chhuahte an ni.

Lunglei Police te hian March ni 14 atanga April ni 23 chhung khan hetiang bawkhian Mobile bo leh ruk te hi mi sawm pakhat an lo hmuh letsak tawh a, a neitute hnenah hlan let vek a ni a; hemi kaihhnawiha dik lo taka lo leitute pawh thubuai siamsak an ni.

<><><>

MENTAL HEALTH CAMP

Mizoram State Legal Services buatsaihin Vawiin khan Aizawla TNT, Muanna vengah Mental Health Camp neih a ni a.

Mizoram University –a School of Medical & Paramedical Sciences, Clinical Psychology Deptt. chuan Mental Health Assessment Camp an nei a, rilru lam harsatna neite tan Counselling pein a mamawhte Disability Certificate neih theih nan test chi hrang hrang an tihpui a ni.

MZU atang hian Teaching Faculty 4 leh M.Phil leh M.Sc.Clinical Psychology Zirlai mi 20 ten assessment an kalpui.

Tlai lamah , Gauhati High Court Chief Justice, Justice Vijay Bishnoi ah he hun hi a hmanpui a, Justice Michael Zothankhuma, bakah Padma Shri Dr. Sangthankima, Founder Chairman, TNT te chuan thu an sawi a ni.

TNT, Aizawl-ah hian thawktu mi 96 leh enkawl lai mi 1714 awmin an vaiin mi 1810 an awm mek a ni.

<><><>

CM MEETS MC AUTHORITY

Chief Minister Pu Lalduhoma'n vawiin khan a office-ah Aizawl Millennium Centre thuneitute kawmin Millennium Centre enkawl dan leh sak chhunzawm chungchangte a sawipui.

Chief Minister hian Millenium Centre-a vantlang inthiarna man chawi lova kalpui theih a nih leh nih loh te, dawr neitute leh a luah chhawngtute inkarah luah man mumal zawk leh inremna dan tha zawk a duan theih em tih te chu Governing Body-in lo ngaihtuah se tha a tih thu a lo hrilh a. Millenium Centre inenkawl na tha taka a kal zel chu lawmawm a tih thu a sawi bawh.

He hunah hian Millenium Centre Authority Manager, Pu R. Lalnunpuia chuan Millenium Centre sak a nih dan kimchang leh tuna an dinhmun te, Chief Secretary kaihhruai Millenium Centre Governing Body-in North Block Building chung lama sak belh tura ruahmanna a lo duan tawh te a sawifiah a. Millenium Centre hi Structural Safety Certificate nei, a original design anga chhawng 4 la sak belh theiha him a ni a. Tun dinhmunah chhawng khat, Food Court tur bik sak belh dan ngaihtuah phawt ni se tiin Governing Body chuan ruahmanna a nei a; an ruahmanna hi Chief Minister hnenah hian an thlen a ni. A sakna sum hi a tir atangin Bank Loan hman a ni a, sawrkar sum ruahman a ni lo. Loan hi an rul zo vek tawh a. Tuna sak zawm lehna tur pawh hi sawrkar sum hmang lova kalpui leh tur a ni. Tunah hian Millenium Centre-ah hian dawr 342 a awm mek a, an zinga 4 hi hun bi neia luahtir a ni a; a dang te chu a leitute hnenah kum 91 chhung atan pek a ni a. Thawktu nghet 8 an awm mek a, rukruk ching lak inven nan High Definition CCTV 66 an vuah a ni.

<><><>

EXTERNAL AFFAIRS MINISTER

External Affairs Minister Dr. S. Jaishankar-a chuan hun lo kal turah India chu khawvela thiltithe berte zinga awm turin a theihna hrang hrangah hma a sawn zel dawn a ti. Vawiina sumdawng pawlte huaihawt inkhawm New Delhi-a neihah he thu hi sawiin Dr. Jaishankar-a chuan India tum ber chu sumdawna awlsam siam chung a theihna leh intihsiakna tihlen a ni a ti a. India chu nasa takin a thang a, insiamthatna tam tak neiin sawrkar inrelbawl naah nasa takin hma a sawn a, sum leh pai pawh fel taka hman niin hmasawna ruhrel te pawh an thang nasa a ti a. Khawl thiamna hman uar a ni tih sawiin thiam thil tih hmasawn kawngah ngawrh taka hmalak a ni a ti.

Khawvela inngirngghona sang chho hret hret chu a ngaimawh thu sawiin Pu Jaishankar-a chuan India chu remna siamkawngah a thawhhlawk ber te zinga mi a ni a ti bawh.

<><><>

ELECTION COMMISSION

Election Commission chuan BJP MP candidate Abhijit Gangopadhyay chu West Bengal Chief Minister Mamata Banerjee chungchang mawi lo taka a sawi avangin insawifiah turin a ti. West Bengal-a Tamluk Lok Sabha-a ding Abhijit Gangopadhyay'an Pi Banerjee chungchang a sawidan chu EC chuan zahpuiawm, dan pel leh mihring zahawmna ti bawrhbang thei a ni a ti a. Hei bakah hian Model Court of Conduct (MCC) bawhchhiatna a ni a ti bawk.

EC chuan Pu Gangopadhyay hi Thawhtanni hmaa insawifiah turin thu a pe a ni..

<><><>

7TH PHASE

Inthlan thawh sarihna chuh tumte tana inhnuhdawh theih hun chu vawiin khan a tawp a. Thlaleh ni 1 ah vote thlak a ni ang. Inthlan thawhsarihnaah hian Lok Sabha constituency 57 ah inthlan buatsaih a ni dawn a. State pasarih leh Union Territory pakhatah te vote thlak a ni dawn a. Uttar Pradesh leh Punjab ah seat 13 ve ve, West Bengal ah seat 9, Bihar ah seat 8, Odisha ah seat 6, Himachal Pradesh ah seat 4, Jharkhand ah seat 3 leh Chandigarh Union Territory ah seat 1 te a ni a. June ni 4 ah vote chhiar a ni ang.

<><><>